

DISSERTATIO JURIDICA
DE
FLVMINIBVS,

Von
Wasser-Flüssen.

Quam
AVSPICE DEO



PRÆSIDE
VIRO

NOBILISSIMO, AMPLISSIMO AC CONSULTISSIMO

DN. GEORG-ADAMO ³Struven/
ICTO ET PROFESS. PVBL. CELEBERRIMO,
INCLYTÆ FACVLT. JURID. SENIORE, ET h. t. DECANO,
CONSILIARIO SAXONICO, ET CVRIÆ PROVINCIA
LIS, NEC NON SCABINATVS ASSESSORE
GRAVISSIMO,

PRÆCEPTORE SVO ÆTERNVM HONORANDO,


*Publicæ eruditorum disquisitioni
submittit*

HENRICVS von Einsiedel/
Eques Misn.

ad diem 17. Augusti. 1659.

JENÆ,

Typis PAVLI ERICHII, 1716.



PRÆFATIO.



A in nos bonitate est benignissimum Numen, ut cuncta, quæ creavit, in nostrum usum ac commodum fieri jusserit. Quamvis eorum plurima lateant Divino judicio corruptas mentes, & quæ natura mortalium gratiâ primum formaverat, nunc invidiâ abscondat, Potentissimo Creatori subinde obsequens: Attamen quicquid vastus oceani ambitus, quicquid immensa terrarum moles complectitur, hominis causâ productum. Neque necessitatibus tantum nostris provisum est, sed & recreationi. Varia & pænè in diversos colores, prout, vel longius abest, vel proprior se conspectus offert, distributa viriditas mirè delectat. Flores arborum & fructus grato odore & gestu demulcent sensus: Fluminum quoque, horum amœnissimis flexibus campos cingentium, & piscium vertilitate faventium acolis, illarum commercia ad vitam civilem necessaria per alveos promoventium, sicuti magnus usus, ita haut minor jucunditas. Sed de his paulò uberius in hoc discursu videre animus est. Optarem saltem jurum circa illa occurrentium eandem facilitatem, quâ delabuntur, & sperarem, me fortè non tanta judiciorum diversitati conatus meos expositurum.



Ulamvis originem vocis spontè cuius obviã esse, facile ci ediderim, morem tamen & veterum JCtorum exempla in *l. i. de off. quæst. l. i. §. i. de pact. l. i. de furt. & passim* securus illam à fluendo deduci, haut praterire lubet. Indè fluminis vocabulum, indè & fluvioritur. Latiùs autem acceptum & rivum & torrentem comprehendit. *Hering. de Molend. qu. 15. Hinc Virg. 2. Æneid.*
— Rapidus montano flumine torrens.

Aliàs rivus est tenuis aquæ decursus, & vel naturalis, vel manu factus: Atque in hoc posteriori significato describitur ab Ulpiano in *l. i. §. 2. de Riv.* quod sit locus per longitudinem depressus, quo aqua decurrat. Amnis quidem etiam rivus est, sed frontibus redimitus. Differunt rivi à flumine magnitudine, ita, ut vel ex plurium conflua flumina fiant, vel ex fluminibus per angustiores meatus deriventur. Torrens verò hisce versiculis à flumine distingui solet:

Flumine perpetuo torrens solet altius ire,
Sed tamen hæc subita est, illa perennis aqua.

Th. II.

Planè autem hinc remotam volo illam significationem, quâ flumen sumitur pro aquâ pluvîa in unum per canales aut tubulos coacta, & ratione ejus duplex servitus constituitur: Fluminis scilicet avertendi & non avertendi. Quarum illa est jus, quo vicinus pati cogitur, ut aqua pluvîa in canalem recepta, in aream, vel solum suum cum impetu feratur: Hæc, quâ vicino non licet, flumen ex suis adibus veniens avertere à nostro prædio. *Vir Amplissimus & Excellentissimus Dn. Georgius Adamus Struve JCtus celeberrimus ac Præceptor meus omni honoris cultu prosequendus, Syntagm. Jurisprud. Exerc. 13. th. 16.*

Fortè,

Fortè, quod priori casu obesse, posteriori prodesse vicino possit. vid. *Manz. tract. de servit. qu. 49.*

Th. III.

Remotà itaque ambiguitate, describo flumen, quod fit aqua in suo alveo perenni fluxu per tipas decurrens. Quinque ejus partes numerari solent: Ortus s. fons, qui caput alias appellatur & exitus, qui pedis nomine venit, aqua profluens, alveus & ripæ. De singulis, quantum ad institutum pertinet, seorsum quædam.

Th. IV.

Magnum fluminum capita veneramus; subita & ex abdito vasti amnis creptio aras habet; inquit Sen. epist. 41. & Tac. 1. ann. c. 29. quosdam populos sacra & lucos & aras patriis amnibus dicasse. Ex horum relatione constat, supersticiosam antiquitatem etiam flumina instar Deorum coluisse; fortè, quod vivas fontium venas & perpetuas fluminum scarurigenes mystici aliquid admixtum habere putaverint. Ita divinos honores Nilø, Euphrati, Tiberi & Mœandro tribuisse, atque illorum insolitas mutationes in omen mutationum imperiorum vertisse Ethnicos, legimus apud eund. *Sen. l. 4. Nat. qu. c. 2. Tac. 6. Ann. Plin. 3. Nat. bist. 5.* Certè & nos, quamvis absque tali religione, naturam hæc in re miramur, quæ ductas per multa miliaria aquarum venas, tandem ubicunque exitus patet, etiam quandoque per saxa emittit. Verumenim verò, unde hæc aquæ tantà sæpissimè vi erumpentes veniant, ubi gignantur, diversæ extant opiniones.

Th. V.

Aristoteles *l. 1. Meteorolog. c. 13.* existimat, flumina ex aëre, vaporibus & subterraneis exhalationibus in aquam solutis pronalci. Quod ita proponit *Jac. Pontanus lib. 3. Progygnasm. 14. Per terræ corpus patent cavernæ & foramina longè plurima, quæ, ne uspiam sit inane admissum rebus, aer à summo*

penetrans complet, & ob frigoris loci tepore suo spoliatus crassior & humidior evadit; Hinc distillans, paulatim, ingeminantibus & crebrescentibus guttis aliquo defluens, fontium fluminumq; scaturigines producit. Etenim, cum aer humido & calido componatur, aqua frigore & humore, si ille coercitus & inclusus in subterraneis specubus calorem amittat, necessario in aquam commutabitur, quæ semel fluendi adepta initium, nunquam desinit, quod ad vacuum prohibendum, novus semper aer in locum colligescens surrogatur, & accessionibus postmodum aliarum aquarum eam augeri perennitatem certissimum est, &c. Sed quamvis in subterraneis specubus magnam aquæ vim latitare, atque inde oriri flumina, negari non possit; tamen illas ipsas aquas & consequenter flumina omnia ortum suum debere solis vaporibus, vix videtur asserendum: nec fortè ea est mens Aristotelis: Quandoquidem illi non sufficiunt tot aquis generandis. Quanta enim vaporum copia esset opus, vel & unci saltem fluvii constitutionem. Sed hæc de re vid. Excellentiss. Dn. Johan. Zeyfeld. not. in Jacobum l. 7. c. 14.

Th. VI.

Alij aquam pluvialem fluminum causam esse, eamque certis quibusdam cavitatibus ac alveis, undè dimanent, intra terram excipi putant. Sed hæc opinio non uno argumento refellitur ab iis, ad quos hoc argumentum spectat: ex quibus hæc de ortu fluminum saltem referimus. Nam primò pluvia per tempus bene longum deficiente, flumina nihilominus manent, quod fieri non posset, si genuina fluminum causa essent aquæ pluviales. Deindè experientia edocuit, aquam talem, quæ decidit, terram infra decem pedes non madefacere, sed partem terræ superiorem, vel totum humorem absorbere, vel expletam facietate nullum excipere atque à se exclusum per torrentes & rivos in flumina diffundere. Verba Sapientissimi Senecæ elegantia l. 30. c. 7. *Nat. qu. quæ huc faciunt,*

ciunt, lubet adjicere: *Ego tibi vinearum diligens fossor affirmo* inquit, *nullam pluviam esse tam magnam, quæ terram ultra decem pedes in altitudinem mædificat. Omnis humor intra primam crustam consumitur, nec in inferiora descendit. Quomodo ergo imber potest suggerere omnibus vires, qui summam humum tangit? Pars major ejus per fluminum alveos in mare deferitur. Exiguum est, quod sorbet terra, nec id servat. Aut enim arida est, & absument, quicquid in se solum est; aut satiata, si quid præter desiderium cecidit, excludit. Quid, quod quedam flumina erumpunt saxis & montibus. His, quid conferent pluvia, quæ per nudas rupes deferuntur, nec habent terram, cui insideant? Adjice, quod in siccissimis locis, putei in altum acti, per ducentum aut tricenum pedum spatia, inveniunt aquarum uberes venas in eâ altitudine, in quam aqua non penetret; ut scias illie non caelestem esse, nec collectitium humorem, sed quod dici solet, vidam aquam.*

Th. VII.

Mihi cum sacrâ Scripturâ sentire videtur tutissimum, quæ Eccles. 1, 7. dicit: *Omnia flumina intrant in mare, & mare non redundat; Ad locum, undè exeunt flumina, revertuntur.* Undè mater aquarum mare & pater ac perpetuus hospes oceanus rectè dicitur. Hoc, quamvis multis incertum videatur, cum vera ejus caussa in aperto non sit, tamen primò sacri Codicis autoritate nititur. Deindè, si quæ in speciem obstantia reperiantur, ea haut difficulter solvi poterunt. Inter ea præcipuum ferè est, quod respectu multarum terrarum partium humilium mare sit, atque sic stante hac sententiâ, aquam contrâ naturam suam sursum niti, sequatur. Verum istud huic opinioni fidem derogare non potest, cum fatear eisdem, aquam recto itinere nunquam ascendere: Nemo autem, ut credo, inficiabitur, eam per varios flexus & anfractus, cavernis specubus & aliis cavis locis terræ immitti, & quia sunt angusta ab

EXTRIN.

extrinsecus incumbente mari compressam, sursum pelli posse. Atque hoc modo, eadem, quā ortum fluminum operā, & exitum eorum indicavi; ubi illud saltem adhuc notavero, quod fluvii, vel in proprio alveo, vel aliis infusi in mare devehantur Nunc ad reliquas partes deveniendum.

Th. VIII.

In iis primum locum occupat, Aqua profluens; quæ, quid sit, cuique notum: Ea scilicet est, secundum quam labi flumen & fluere dicitur; cujus partes singulas aliis alias succedentes spectamus. Movetur illa, vel naturali suo cursu, quo ob loci positionem & devexum alveum ad inferiora subindè decurrit, qui motus internus vocatur: Vel incitatur à vento, tempestate, terræ motu, qui externus *Sen. l. 3. c. 3. Nat. qu. Gryph. de Insul. c. 18.* Hic fortuito & quandoque saltem fit: Ille perpetuo & quamdiu flumen durat. Nec dubium est, etsi quædā flumina à terrā absorbeantur, ea nihilominus continuato intra illam cursu iterum prorumpere. Ita Rhodanum in Galliis terræ, non sine strepitu, immissum, post intervallum quoddam se exere, certum est: Tigridem in Oriente idem facere testis est *Sen. l. 2. Nat. qu. c. 26.* Cujus verba, cum hoc ipsum non sine consuetà concinnitate efferant, adscribam: *Quædam flumina, inquit, palam in aliquem specum decidunt, & sic ex oculis auferuntur; quedam consumuntur paulatim & intercidunt: Eadem ex intervallo revertuntur, recipiuntq; & nomen, & cursum. Causa manifesta est, sub terrā vacat locus. Omnis autem humor naturā ad inferius & ad inane desertur. Illo itaq; recepta flumina cursus egere secretò. Sed cum primum aliquid solidi, quod obstaret, occurrit, præruptā parte, quæ minus ad exitum repugnabat, repetiere cursum.*

Th. IX.

Sequitur nunc, ut de alveo videam, qui est fossa illa, per quam flumen labitur. Dicitur aliàs venter fluminis seu lectus ejus,

ejus, in quo recubat: *Bartol. tr. de alluv. in pr.* atque dividitur, in naturalem i. e. consuetum sive antiquum, & non naturalem, puta, quando inundatus est. Mutant verò quandoque alveos suos flumina idque vel arte ducente vel naturâ: Prius fit, cum derivantur flumina, ut aliò cursum suum dirigant, quam consuevère, quo de prudentissimum Taciti iudicium extat *l. 1. Ann. c. 79. Optimè rebus mortalium natura, consuluit, quæ sua ora fluminibus, suos cursus, utq. originem, ita fines dedit.* Quod ipsum *Forst. not. ad b. l.* confirmat, dum inquit: *Fluminum derivationes vix unquam benè successisse, perpetuâ observatione notatum est: Nec enim sibi vim inferri natura patitur.* Posterius, cum proprio motu alio fertur: De quo inferius plura.

Th. X.

Postremo loco de ripis etiam quædam addenda veniunt, quæ sunt crepido sive illa continentis extremitas, quæ utrinque flumine alluitur & flumen continet. A Jctis describuntur, quod sint id, quod flumen continet, naturalem cursus sui rigorem tenens *l. 1. §. 5. de Flum.* seu, quæ plenissimum flumen continent *l. 3. §. 1. eod.* Sicut igitur littora maris, ita ripæ fluminum termini sunt, quamvis interdum hasce appellationes confundi, notet *Oetting. de jure & contrav. lim. l. 1. c. 12. lit. l.* Cæterum si quando vel imbris, vel mari, vel aliâ ratione ad tempus excrevit flumen, ripas non mutat. Nemo enim, dixit, Nilum, qui incremento suo Ægyptum operit, ripas suas mutare, vel ampliare. Quamdiu igitur ad perpetuam suam mensuram redit, non mutat, sed ripæ alvei ejus muniendæ sunt. Si verò naturaliter creverit, & perpetuum incrementum nactus sit, vel alio flumine admixto, vel quâ aliâ ratione, dubio procul est, ripas mutasse, sicut, si alveo mutato aliò cœpit currere *d. §. 5.* Duplicem autem significatum habere ripas, tradit *Dilectus Dominus Parens tr. de Regal. c. 1. n. 280.*

Primò enim esse ripas, quæ sec. Paulum in *d. l. 3. §. 1.* plenissimum flumen continent; solum sc. seu sabulum illud, quod à plano ad fluvium usque declive est: Secundò non nudam illam terræ extremitatem indigitari, sed aliquid de solo plano, quod ripæ declivi contiguum est atque usum navigantibus præbere potest. *l. f. b. t.*

Th. XI.

Hæc de divisione totius in suas partes attigisse sufficiat, ordo in præsentī postulat, ut de divisione generis in suas species agatur. Dd. autem flumina variè dividunt & quidem (1.) ratione quantitatis in Majora & Minora: (2.) Ratione fluxus in Perennia & non Perennia seu torrentes. Illa, uti faciliè constat, vocant, quæ semper fluunt, & quamvis quandoque exarescant, tamen talia esse non desinere statuunt; *Sigism. Bug. Diss. de re & jure aquat. tb. 48. Stypm. de jure marit. & naut. part. 2. c. 5. Gryphind. de Inf. c. 2.* Hæc, quæ hyeme fluunt, æstate verò exsiccantur. Sed hæc aliqua distinctio potius est, quàm vera divisio. *vid. supra tb. 1.* (3.) Ratione specialis usûs in navigabilia & non navigabilia: Illa dicuntur, quæ naturâ suâ navigationi apta sunt: Atque hoc sufficit, licet actu nunquam in iis navigatum sit. *Stypm. d. tract. c. 7. Sigism. Buchn. d. tb.* Siquidem hoc nomen verbale (navigabile) ex propriò suò significatione aptitudinem tantum & potentiam denotat, non actum, ut possibile, vendibile mobile. Hæc sunt, in quibus nequit navigari, vel quod non sint satis profunda, vel trunci arborum, saxa, aut alia impedimenta transiui obstant. (4.) Denique sunt vel publica vel privata.

Th. XII.

Publicum aliquid privatumque diversimodè dici tradit *Sigism. Buchn. d. diss. tb. 46. & 47.* Publicum nimirum esse, (1.) quod & patrimonio & usu populi est: (2.) Quod usu tantum: (3.) Specialiter, quod unius populi: Privatum idem duo-

duobus modis accipi: Primò pro eo, quod publico opponitur, quod scilicet usui publico aptum non est: Secundò pro eo quod singulorum est. Idem quod hoc attinet, testatur *Hering. de Molend. qu. 15.* publici autem adhuc aliam acceptiorem affert, quâ vel pro eo, quod est populi Romani, siue superiorem non recognoscentis, vel, cujus usus in commune, expositus est & omnibus patet de populo, sumitur, quasi dicas populicum. Coeterum, quid flumen publicum sit, quid privatum, non inter Dd. convenit. *Sigism. Buchn. d. diff. tb. 51.* flumen privatum esse dicit, quod ad tempus fluit & navigabile non est, alii aliter. Melius fortè flumina privata describes, quod sint, quæ quoad dominium & commercium ad privatum pertinent. Hoc est, de quibus libera disponendi facultas privato competit. *Justus Meier. Coll. Argent. ad tit. de Flum.* Publicum flumen ab Ulpiano Celsi & Cassii sententiam approbante in *l. 1. §. 3. de Flum.* describitur esse id, quod perenne est: Cui quamvis quidam Dd. hoc non sufficere statuentes, alia requisita ex *l. 2. h. t. l. 1. §. 1. eod.* superaddant, atque hæc interdum concurrere dubio careat, non tamen facile à LL. sententiâ recedendum, præsertim cum ea sec. jus Digestorum, non incommodè defendi possit add. *§. 2. l. de rer. div. Dn. Ludwell. not. ad Wesenb. parat. in h. t.*

Th. XIII.

Flumina itaque omnia strictè ita dicta vid. *tb. 1.* publica sunt *§. 2. l. de rer. div. l. 4. ff. cod.* Et ut olim in populi, sic deinceps in Principis potestate, quoad jurisdictionem, quoad usum verò omnibus communia fuerunt. *d. §. 2. & §. 4. eod. Oetting. de jure & contro. lim. l. 1. c. 12.* Hinc si vel in instrumento, vel statuto verbum (flumen) inveniatur, publicum intelligitur & tale præsumitur, donec probetur contrarium. *Stypm. d. tr. part. 2. c. 5. & ab eo alleg. Sigism. Buchn. d. Diff. tb. 47.* Jam, dum flumen publicum dixi, ejusdem juris &

aquam & alveum & ripas esse, statuere non ambigo. Et alveus quidem absolute talis est, cum subinde fluminis sequatur, conditionem & impossibile sit, ut alveus fluminis publici, non sit publicus *l. 1. §. 7. de flum. Sigism. Buchn. d. diff. tb. 52. Gryphiamd. d. tr. de Inf. c. 11. Diff. Hering. de Molend. qu. 15. n. 11.* Quamvis enim alias, quicquid solo imponitur, solo cedat: *§. 29. 31. 32. l. de rer. div.* Tamen primò hæc regula ob limitationes, quas aliàs etiã patitur, hùc vix extendi poterit: Deinde flumen cum alveo non ita cohæret, ut æficia, vel plantæ, vel sata cum solo, sed planè speciem terræ in quâ fluit, immutat & non est alveus, nisi ubi flumen.

Th. XIV.

Aqua & ripæ fluminum certâ ratione publicæ sunt: Aut enim aqua consideratur, ut talis simpliciter, eum usum præbens, quem quâlibet alia, ad lavandum, aquandum pecora &c. & hoc sensu communis est. *§. 1. l. d. t.* Aut ut collecta flumen constituit, & usus ejus in piscando, navigando consistit, & hoc respectu huc pertinet. *d. §. 2. Donell. 4. comm. c. 2.* Ripa, si pro nudâ illâ extremitate sumatur, quæ plenissimum flumen continet *l. 3. §. 1. b. t.* sine dubio absolute publica est *d. l. 3. b. t.* cum tunc & ipsa pars alvei sit *v. l. 1. §. 7. Eod.* Si verò talia terræ spatia intelligimus, quæ illis extremitatibus contigua usum præbere possunt navigantibus, tunc quod usum publica, quoad proprietatem privata sunt, & illorum quidem, quorum prædiis hærent. *§. 4. l. de rer. div. l. 5. ff. eod. l. 30. §. 1. de acqu. rer. dom. Disceus Dn. Parens tr. de Reg. c. 1. n. 280. c. 3. n. 60. Stypm. d. tr. part. 2. c. 5. n. 357. vid. thes. 10. in fin.* Inde naves ad eas appellere, funes a arboribus ibi natis religare, onus aliquod in his reponere, retia siccare & ex mari reducere, (quod hic insertum esse, non immerito miratur *Hering. d. tr. qu. 17. n. 17.* cum de ripis, non de litoribus sermo sit) cuilibet liberum est. *l. 5. de rer. div. §. 4. l. eod.*

I. eod. Sed mirum cuidam videri posset, ripas non sequi conditionem fluminis, ut litus maris. §.5. *I. d. t.* Huic igitur dubio & superius dicta ex parte satisfaciunt: Deinde ratio differentiae hæc est, quod littora mari subiaceant & quotidianis accessibus ab eo occupentur; ripæ econtra non subiaceant flumini, sed illud contineant. *Bronchorst. 1. Miscell. assert. 5. Stypmann. d. tr. part. 2. c. 5. n. 359. Donell. 4. comm. 3. lit. d.* Denique *Besold. Dissert. de jure & div. rer. c. 2. n. 5.* cum id etiam litus vocitur, quod mari adjacet, quamvis refluxu maris non obruatur, & ubi ædificium poni potest *d. l. 5. de rer. div.* putat in eo esse differentiae rationem: Quod accolæ riparum teneantur eas munire, adeoque æquum sit, ut ad ipsos pro hoc incommodo pertineat proprietas: In littoribus autem hoc secus esse.

Th. XV.

Dixi superius *v. 16. 13.* flumina, ut olim in populi, ita deinceps in Principis potestate fuisse, atque eo ipso ad Regalia pertinuisse & adhuc pertinere volui indignitatum. De quo quidem Dd. unanimiter consentiunt, quæ autem ratione, quo respectu ad illa referantur, de eo opiniones eorum mirè variant. *Stypmann. d. tr. part. 2. c. 5. n. 52. & c.* existimat: Flumina in dominio, patrimonio, liberrimâ potestate, & omnimodâ proprietate Principis esse, atque hoc modo ad Regalia referri. Contrariam huic opinionem fovet *Hering. de Molend. qu. 16. n. 25.* ac non sine zelo quoddam defendit, erroris arguens, qui contra statuunt. *Oerting. d. tr. l. 1. c. 12.* ex *Baldo in l. si plures C. de condit. insert.* assert, quod flumina quidem universim considerata, sint in dominio Cæsaris & Imperii, sed si ad singula respiciatur, eorum proprietatem pertinere ad eos, quorum territoria transcutunt. Denique *Petr. Frider. Mindan. tr. de process. mandat. l. 2. c. 36. n. 6.* putat: Vias & flumina publica ratione jurisdi-

tionis pro Regalibus haberi, & jurisdictionem illam se extendere eò, ut etiam ex iustà causà prohiberi possit, ne in flumine navigetur. Quam sententiam & ego probò, si de jure Civili sermo sit. Nimirum ratione proprietatis & usus ea ad Regalia non relata fuisse, patet ex *d. §. 2. & 4. de rer. div.* Is enim fuit publicus, h. e. cuilibet ex populo liberum fuit piscari, & per ipsum flumen navigare *dd. text.* Quoad jurisdictionem vero eò pertinuisse testatur. *l. 2, b. t.*

Th. XVI.

Hodierno jure omnia flumina navigabilia, & ex quibus fiunt navigabilia, non solum quoad dominium & jurisdictionem, sed etiam quoad proprietatem & utilitatem inde proveniente ad Regalia & publica Imperii bona referuntur. *2. feud. 56. Ampliè. Dn. Struve, Syntagm. Jur. Feud. c. 6. aph. 7. n. 6. Gryphiand. d. tr. c. 12. n. 6. Sigism. Buchn. d. diff. tb. 49.* Inde Principem & alios, qui ab eo Regalia habent, posse libere de fluminibus disponere, dubio caret: Ex æquitate tamen privatis usum navigiorum & aquarum prohibere in totum sine causà non debet, quamvis restringere illum & certas ei condiciones addere possit. Optimè autem in *c. un. que sint Reg.* tantum flumina navigabilia & ex quibus fiunt talia, inter Regalia referuntur, tum quod majorem defensionem, ut tutum iter pateat navigantibus, & majorem curam, ne vitæ merces, vel in-vel evehantur, exigant, tum quod locupletes redditus sine damno subditorum fisco inferant. *Stypmann. de jure marit. & naut. part. 2. c. 5. Henning. Arniseus de jur. Majest. lib. 3. c. 5.*

Th. XVII.

Ex his igitur constat, flumina non amplius usu, h. e. ita publica esse, ut usus eorum liberrimus populo sit concessus, sed Principes eum limitasse, sibi omnia vendicasse commoda, quæ ex iis proveniunt, atque flumina diutissime possessa, nunc jure

jure proprio tenere. Hæc omnia non injustè facta esse, vel inde patet, quod nullum subditorum detrimentum sublit. Quamvis enim usus ille coarctatus sit, tamen nemini aliquid decessit de suo: Et sanè præstat ad sustentationem Imperii & augendos redditus tale quid occupare & impendere, in quo nemo privatus sibi aliquid juris afferere potest, quam subditos immoderatis tributis onera. Atque subditi facilius exiguo tali commodo, quale usus omnibus absque dubio foret, carere, quam se ita ultra modum gravari pati possunt. Imò commodum potius ipsorum in eo versari videtur: Cum non pauci piscationibus debiti otio essent vacaturi, atque hoc modo defuturi, qui artificijs, qui laboribus, operam navarent. Deinde etiam si hoc non sine damno quodam subditorum fieret, publica tamen utilitas privatæ est anteponenda. Accedit, quod, cum quæ communia sunt, fiant privati, qui ea occupat, nihil veteri fieri publica, & ad Principem pertinere, quæ ab ipso occupantur.

Th. XVIII.

Flumina hæc, aut retinere Principes, ac elocare solent, sibi tamen plerumque quibusdam reservatis, aut aliis in feudum concedere, directo dominio apud ipsos remanente. Ita Principes Imperii nostri de territoriis suis investiti, & exercitium summi post Imperatorem Imperii, omnia Regalia ac per hoc jura fluminum possident. Ita nobiles immediati ab Imperatore, ita mediati ab Imperii statibus per investituram flumina tenent, & quomodo sunt in patrimonio Principis, ita deinde ad cessionarium vasallum pertinent. *Ampliss. Dn. Struvc, Syntagm. juris feud. c. 6. aph. 7. & 22. Stypman. d. 11. part. 1. c. 2. 7. 8. part. 2. c. 5. Hering. qu. 15. n. 13.* Hinc jure feudali quædam flumina Regalia, quædam Bannalia dicta sunt: In illis Princeps jure patrimoniali vectigal capit, & ideo modum & tempus piscationis constituit iisque Magistratus proprios præficit. Bannalia, quæ eruditi præscripta vocant, quibus-

busdam beneficiariis sive Vassallis aut concessione Principis, aut longi temporis præscriptione, ut alio justo titulo quæsitæ sunt. *Oetting. d. tr. l. 1. c. 12. ubi etiam alias adhuc fluminum distinctiones affert.*

Th. XIX.

Acquisito jure fluminum, tria potissimum commoda domino inde obveniunt. Piscatio nimirum, inventa & navigatio. Piscationem quod attinet, ea antiquitus, & secundum juris Gentium dispositionem omnibus communis fuit §. 2. *J. de rer. div.* Præsertim, cum pisces inter eas res relativi sint, qui primi occupantis fiunt. §. 12. *cod. l. 14. de acqu. rer. dom.* & injuriarum actio contra prohibentem detur. *l. 13. §. 7. de injur. l. 1. §. 9. ne quid in loc. pub.* Nec obstat, quod in *l. 7. de divers. & temp. præscr.* dicitur, quod, si quis solus pluribus annis in fluminis publici diverticulo piscatus sit, alterum eodem jure uti prohibere possit: Id enim ex *l. 45. de usurpat. & usucap.* explicandum; quod scilicet, quamdiu usum istum continuat, & diverticulum non deseruit, alterum arcere possit. Atque sic immotæ veritatis manet, præscriptionem longæ possessionis ad obtinenda loca jure Gentium publica, concedi non solere, *d. l. 45. add. l. 6. de rer. div. Gotthofr. in not. add. l. 45. Donell. s. comm. 22.*

Th. XX.

Hodiè sicuti flumina, ita & jus piscandi & redditus piscationum sunt de Regalibus. *Ampliss. Dn. Struve Syntagn. Jur. Feud. c. 6. apb. 7. n. 10.* Licet enim privati sæpius jure jus piscandi & ex eo redditus habeant, id tamen à superiore obtinuerunt. Atque hoc jus, si id non alij concesserit, pro certo vectigali elocare potest Princeps *l. 7. ut in flum. pub. 1. de loco pub.* Deinde in Principis etiam est arbitrio, inquit *Sigism. Buchn. diss. de jure aquar. tb. 79. licet privatum sit flumen, modum præscribere, quomodo & quo tempore capi debeant pisces,*
vel

vel non: Ut, ne quando sobolescent, wann sie leichen. In publicis autem fluminibus, ut quibusdam piscari non aliter, quam hamo, mit dem Angel / aliquibus cum certo saltem, nonnullis cum omni genere retium atque excipularum liceat, mit Wurffgarn / Neussen und Aelstock legen / beyrn Licht fischen oder Krebsen: Omnibus vero in perpetuum severissime interdicere, ne globulis quibusdam, mit Fischaaß / pisces extrabant majores, minutulos vero deperditum eant. Cæterum concessio à Principe jure piscandi in flumine, non statim etiam aucupium, anseres, anates, aliasque feras aves retibus in flumine vel ad ripas capiendi, vel etiam sclopeto trajiciendi concessum videbitur. Sed anne domino foresti, an verò aquæ domino, jus venandi castores, fibres & lutras competat, dispiciamus. Sanè amphibia sunt, & in terris æquè ac aquis aluntur & vivunt: Mulum damni piscationi, fruticibus, arboribus in ripâ positis, quas dentibus, ut ferro cadunt; ipsis denique ripis perfodiendo eas inferunt. Ideoque, cum ambo incommodum inde sentiant, non dubito utrique jus venandi has bestias adjudicare. d. Diss. th. 58. vid. Noë Meur. Jagt und Forstrecht. verbis. Doch schließlich finde ich bey den erfahrenen geschickten Jägern / daß der Otter gar keine Freyung / in Forst gar nicht gehörig / von männlichen (denn man nicht allwege den Forstherrn gleich an der Hand haben mag) umgebracht möge werden / es wäre denn / daß die Hunde in Forst oft und zu Unzeiten geführt / dem Forstherrn dadurch sonderer Schade zugefügt würde.

Th. XXI.

Inventa v. th. 19. jure Gentium & illi assistente jure Civili regulariter primo occupanti cedunt, ac sunt inventientis §. 18. I. de rer. div. Inveniuntur autem, vel quæ nullius, vel quæ alicujus fuerunt: Illiusmodi sunt lapilli, gemmæ, margaritæ, aurum; quod in quibusdam fluminibus aureas are-

nas volventibus reperiri testator *Gryphander d. tr. c. 18. n. 49.* *Noë Meur. d. tr. c. von Goldgründen des Meins.* Hujusmodi sunt (1.) res pro derelicto habitæ & quas dominus eâ mente abiecit, ut eas in numero rerum suarum e e nolit: Quarum dominus inveniens statim efficitur, cum alter, eo ipso quo abiecit, dominus earum esse desinat. §. 47. *I. d. t.* (2.) Thesaurus, quem, si quis in flumine proprio invenit, solus jure Civili capis §. 39. *I. b. t.* Ab alio fortuito repertum inventor cum domino fluminis dividit: Datâ verò operâ in alieno, vel Magicis artibus in suo scrutanti mercedem denegatur, & posteriori casu applicatur fisco. *Sigism. Buchn. d. diff. tb. 117.* Jure feudali thesaurus in flumine per feudum concessio, sive ab ipso vasallo, sive à tertio inventus, inter dominum feudi, & inventorem dividendus est: *Schultz. Synops. Inst. Imp. ad d. t. lit. a. a.* Et in quibusdam etiam locis ad fiscum refertur. *Ampliss. Dn. Struve in prælect. add. §. 39. (3.)* Bona naufragorum, quæ ex consuetudine Siciliæ, Angliæ, Italiæ & olim Germaniæ ad Regalia referri & Magistribus reservari, ex *Luca de Penna in l. t. C. de naufrag. & Kirchn. de re-pub. Diff. 17. coroll. 7. tradis Schultz. d. loco lit. t.* Verum hanc consuetudinem tanquam valde iniquam sustulit *Frid. II. Imp. in ant. navigia, C. de furt.* Quem etiam secutus est *Carolus V. in Const. crim. art. 218.* Imò ex dispositione juris Canonici, qui ex naufragiis emolumentum capiunt, & naufragiam passos spoliunt, ipso facto sunt excommunicati *c. 3. ext. de Raptor. Job. Loxen. de jure Maris. l. 1. c. 7. vid. Stypm. d. tr. p. 5. c. 5.*

Th. XXII.

Hodiernâ consuetudine, quod bona attinet, quæ alicujus fuerunt, idem, quod jam dictum, observatur: Quæ verò antea à nemine possessa sunt, hodiè ad Regalia pertinent. Hinc *Sigism. Buchn. d. Diff. de jure aquat. tb. 215.* Reperta in fluminibus & ripis jure Civili occupanti conceduntur. Est ta-

men

non huic juri per Principes & Magistratus flumina & mare accolentes, nec sine gravissimâ ratione, publicum bonum potissimum concernente, derogatum &c. Uti noviter à Senatu Aquitanico inventoribus massa cujusdam Ambre, quæ aliquot mille coronatis aestimabatur, ad litus ejecta, restitucio injuncta, & adjudicata domino, cui omnimoda jurisdictio ibi locorum concessa fuerat. Hanc consuetudinem semper ferè & ubiq; obtinuisse, vetus testis est Historia. Purpura color, qui fiebat ex sanguine rutilantis piscis marini, soli semper Imperatori reservabatur. In Insulâ Obiade crescentes & ad litus appulsi Topazii, solis cedebant Ægyptiorum Regibus. In provinciâ Palestina gemmas preciosas, quas Galli Balais vocant, Rex capit. In Tartariâ reperti adamantes & alia gemma omnes ad ipsorum Imperatorem pertinent. Succinum, electrum, blessum, quæ alluvione, non nisi ad litus Sarmaticum in Prussia, quando Auster spiras, appellant, Serenissimo Electori Brandenburgensi, Prussie Duci cedunt. Simili superioris aetatis jure Turcarum Imperator sibi sumit terram sigillatam, quam singulis annis sextâ Augusti ex monte Vulcani fodi juvet. Uti & Magnus Dux Moscovia preciosissimas pelles zobelinas sibi vendicat.

Th. XXIII.

Navigaciones, in quibus tertius fluminum usus consistit quamvis in mari potissimum frequententur, non tamen inusitatae sunt etiam in fluminibus, ubi æquè ac in mari sua secum ferunt commoda ac utilitates. Quamvis enim magis diffixæ regiones adiri per maria, earumque commoda mutatis mercibus, pervulgi in cœteras possint; sunt tamen etiam flumina, quæ per diversas oras labentia, commercia promoyent. Atque ob horum commoditatem inventa est navigatio, cum longè minori operâ aliquid in navi, quam in curru vehatur ac facilius imò citius quandoque de loco in locum perferatur. Libera illa cuique fuit antiquitus per

pius aſſeg. §. 4. 1. de rer. div. Job. Loccen de jure Marit. lib. 1. c. 4. Hodiè à Majestate præditiſt eſt reſtriſta, uti infra tradetur. Ut autem eò meliori ordine procedam, primam agam de navibus, deinde nautis, poſtremo de rebus, quæ vehuntur.

Th. XXIV.

Naves olim trium præcipuè generum erant: Bellicæ, quæ remis impellebantur, nonnunquam etiam velis & longæ erant, ſimiles ſerè hodiernis navibus galeatis: Aſtuariæ, quibus homines trajiciebantur, & Onerariæ. Harum in omnibus benè conſtitutis Rebuspubl. magnam copiam habebant. Sed cum his navium ſpeciebus in mari potiſſimum uſi ſint, & de ſtructurâ navium, de generibus & varietate, de inventoribus earundem (quorum primum Noamum fuiſſe perhibent) jam quædam conſcripta extent, eorundem exſcriptione implere paginam non lubet, ſed eo remitto curioſum, lectorem. vid. LAZAR. Bayſ, in l. 11. de captiv. & poſſ. lim. reverſ. Sigism. Buch. d. diſſert. th. 219. 220. 221. Hering. qu. 16. Ubi etiam de natatoribus & urinatoribus jucundas quasdam Hiſtorias aſſert. Stypmann. part. 3. c. 2. 3. 4. Quæ hodiè navigationi in fluminibus inſerviunt navium genera, non adeò ignota ſunt. Scaphis enim (Germ. Rähne / Fiſcherſähne) utimur: Item majoribus navibus, vel cum velis, ſi nimirum adverſus flumen navigandum ſit, vel ſine iis; & aliis, quibus flumen trajicimus, Germ. Fehren appellatis.

Th. XXV.

Nautæ diverſas, quæ circa navim dirigendam occurrunt, functiones obeunt; & ſunt genus hominum plerumque leve, impium, & nullius ſerè ſcleris expers: Id quod cum aliis, quibus pericula ſemper præſentia ſunt, commune habent. Indè eſt, quod multò ſeverius, quam alii, Navarchi in delinquentes ſuos animadvertant, & admodum levi

levi de causâ in leges nauticas peccantes ad malum jubeant suspendi. Atque hæc Jurisdictio Navarchi in suos subjectos, nulli loco est adstricta, sed navi quasi cohæret. *Sigism. Butchn. lb. 242. De variis nominibus & functionibus nautarum vid. d. autor. lb. 193. Stypm. p. 3. c. 5. 6.* Inter alias personas; quæ nautarum generali vocabulo comprehenduntur, occurrunt Exercitor, & Magister navis. Ille est, ad quem omnes obventiones & reditus ex navi perveniunt, sive sit dominus, sive conductor navis per aversionem. *l. t. §. 15. de Exerc. act.* Hic vocatur, per quem Exercitor navem exercet, cui scilicet totius navis cura demandata est. *l. 1. §. 1. 3. d. t.* Ex hujus contractu datur ob causas in *pr. d. l. 1.* à Jcto expositas, actio adversus Exercitorem, Exercitoria inde dicta: Et est, quæ ex contractu à Magistro navis secundum modum præpositionis gesto, Exercitor navis convenitur. *§. 2. l. quod cum eo qui in al. pot.*

Th. XXVI.

Pro fundamento habet illum ipsum contractum, à Magistro navis ejus rei nomine, cui præpositus fuit initum. Ipsa enim præpositione videtur fidem suam Exercitor interponere. Datur hæc actio ei, qui secundum formam præpositionis cum Magistro contraxit, & ob singularem contrahentium utilitatem contra stricti juris rationem à Prætorè est introducta. *d. l. 1. pr. b. t. §. 2. l. Quod cum eo qui in al. pot.* Constat igitur hinc, quod in legem & formam hanc præpositionis diligenter sit inquirendum, nam si egressus eam fuerit contrahens cum Magistro, Exercitor non obligabitur. *l. 1. §. 12. b. t.* Certi autem esse hæc de re possumus, si expressum domini mandatum extet, quod ostendere debet Magister; aut voluntas ejus ex scientiâ & patientiâ colligi possit. Si mutuum pecuniam absque mandato acceperit Magister, quid dicendum? Ego obligari Exercitorem assero, si modo sequentia

concurrant: (1.) Ut sciat in hoc se credere, cui Magister quis sit præpositus: (2.) Ut res in eâ causâ sit, ut impensam illam, e.g. navis refectorem, desideret. (3.) Ut hâc lege credat, & præpositus eâdem accipiat pecuniam, ut impenderetur in rem. (4.) Ut non multo major pecunia credita fuerit, quam ad eam rem fuisset necessaria: Et (5.) Ut in eo loco credita sit pecunia, in quo id, propter quod numerabatur, comparari potuerit. *l. 1. §. 9. l. ult. §. 2. b. t. Ampliſſ. Dn. Struve Syntagm. Jurisprud. Exerc. 20. th. 10.* Competit actio Exercitoria contra Exercitorem, etiamsi vel mulier, vel pupillus fuerit, modò hic tutoris adhibuerit autoritatem. *l. 1. §. 16. b.* Quod si plures sint, qui navem exerceant, singuli ex contractu Magistri, (utpote cum quo uno non cum pluribus contractum) in solidum tenentur, utramen is, qui aliquid præstiterit, id societatis iudicio à cæteris consequatur. *l. 3. l. 1. §. ult. l. 2. l. 4 §. 1. b.* Persequimur hâc actione, quod secundum cujusque contractus cum Magistro initi naturam nobis debetur, & eligere possumus, utrum Exercitorem hâc Prætoriam, an Magistrum, modò persona libera sit, actione directâ civili ex proprio contractu convenire velimus. *l. 1. §. 17. b.* Sed ex contrario exercenti navem, adversus eos, qui cum Magistro contraxerunt, actio non promittitur, quia non eodem auxilio indiget, cum, aut ex locato cum Magistro, si mercede ei operam exhibet, aut si gratuiam, mandati agere possit. Aliquando tamen dominus juvatur. *d. text.* Atque hæc de hâc actione delibasse pro modo instituti sufficiat, plura, qui volet, adeat *Ampliſſ. Dn. Struv. d. Exerc. 20. & Strypmann. p. 3. c. 15.*

Th. XXVII.

Succedit nunc, ut & reliquas actiones, quæ in Exercitorem dantur, attingamus. Duz autem nobis competunt obres nostras in navem illatas; altera ex quasi contractu, quæ
Voca-

vocatur actio de recepto, altera ex quasi maleficio. Illius fundamentum est, uti dictum, quasi contractus, qui inducitur ex facto receptionis, quo exercitor navis censetur tacite promittere, salvas fore res receptas. Neque enim opus est, ut speciatim designentur res, seu custodia exercitoris expresse committantur. Amissam tamen forte arcam & res inclusas petens, probare debet, quænam fuerint res. Competit vectoribus res suas inferentibus *l. 1. §. 1. Naud. camp. stab.* etiam si gratis navigaverint *l. 6. pr. cod. adversus Exercitorem*, si vel ipse res receperit, vel Magister navis, vel alius, cui rem committi iussit *d. l. 1. §. 2. & 3.* Ex nautarum & mesonatarum receptione haut obligatur. Persequimur hæc actione rem illatam, vel salvam receptam, ac præstare debet Exercitor omne damnum etiam levissimæ culpæ datum. *l. 3. §. 1. b. t.* Hæc oritur ex quasi delicto, cum aliquatenus culpæ reus putetur, qui operâ maiorum hominum utitur. *§. ult. l. de Obligat. quæ ex quasi delict. nasc. l. ult. §. 4. b. t.* Instituitur à vectore, cui in navî ab iis, quorum operâ utitur Exercitor, non à reliquis vectoribus, tunc enim non obligatur. *l. 6. §. 3. b. t.* damnum datum, aut furtum factum, contra Exercitorem. Quod si plures navem exercent, datur adversus unumquemque pro parte, quam in navî habet. Est hæc actio in duplum & perpetua, quamvis in hæredem non detur. *l. ult. §. 1. & 6. b. t.* Queniam autem, inquit Amplifl. Dn. Struve *Exerc. 8. tb. 117.* ex tacito consensu venit prior actio, ac posterior ex præsumptâ culpâ, ideoque, si consensus iste non adsit, & culpam quis à se declinet, neutra dabitur. Quod contingit, si prædixerit, ut unusquisque res suas servet, neque damnum se præstaturum. *l. 7. pr. b. t.* Nec opus est, ut expresse consentiat prædictioni vector, sed sufficit tacitus consensus. *vid. d. Exerc. 8. tb. 106. & c. Stypmann. p. 3. c. 15. n. 298.*

Cæterum vehi possunt regulariter omnes res, *v. lb. 23.* modò non sint in numero mercium vetitarum; hæ enim fisco vindicantur. Dixi autem supra restrictam esse hodiè navigationem: Id nimirum factum est per Vectigalia, Ripatica, & jus Stapulæ. Vectigalia ritè continuoque præstari, Reipub. imprimis interest, cum juxta *Cic. in Orat. pro L. Man.* sint ornamenta pacis, subsidia belli, nervi Reipub; Et coarctatio hæc libertatis navigationis, quamvis odiosa videatur, reverà tamen talis non est, sed potius publicum favorem meretur *L. 10. C. de vectig. & commiss.* Magnos enim sumtus locorum publicorum cura & securitatis & navigandi commoditatis conservatio requirit: Neque exigua tam Principis, quàm Imperii salus in vectigabilibus sita est, atque illis efficitur, ut non modo sit pecunia, quæ in necessarios usus pendatur sed & supersit, quæ ponatur in ærario. *Knichen. de Sax. non prov. jur. c. 5. n. 82. Sigism. Buchn. d. Dissert. thes. 129.* Sunt itaq; de regalibus ad Imperatorem in nostra Republicâ, ex ejusque concessione ad Electores & cæteros Imperii Status pertinent, qui deinde suis subjectis ea rursum concedere possunt. Sicut expresse consensu superioris ita & Præscriptione acquiruntur regalia vectigalium: Et quidem contra Principem tempore immemoriali: Is enim tam diu vectigalia exigere passus permisisse censetur, & ejus patientia habetur pro consensu: Contra inferiorem, qui ea jam à Principe impetravit, juri huic, ut loquuntur, jam formato, quadraginta annis præscribitur, *Sigism. Buchn. lb. 133. 137. 138.*

De omnibus rebus ac mercibus, etiam de navi vacuâ solvitur vectigal, in transitu nimirum, non in reditu, cum amplius, quam semel pro eadem re gravari, iniquum sit. Exciipiuntur tamen res quædam, quæ privilegiatæ sunt: Ut res

exer-

exercitui paratæ *l. 9. §. 7. de Publican.* res fisci *d. l. §. 8.* res
 juris exercendi gratiâ & ad proprium usum destinatæ *l. 5. C.
 de vectigal.* Quibus Dd. addunt res studiosorum, ut & Do-
 ctorum & Professorum *Vid. Stypmann. p. 5. c. 3. & ab eo allegati.*
 Quorum res ulterius à vectigalibus immunes sint persequitur
Sigism. Buchn. th. 145. &c. Ut autem constet, quantum pro
 mercibus universis præstare debeant nautæ vel mercatores,
 necesse est, indicent eas ac profiteantur & quidem fidelissimè.
 Huc pertinet jus Geranii: Exstructas enim habent magnæ
 Civitates, propè flumina navigabilia sitæ, machinas quas-
 dam, Krant appellatas, quibus absque magnâ operâ ingens
 moles tolli potest: Et utuntur iisdem ad exonerandum mer-
 cibus navem, & utilitati vectigalium aduersus mercatorum
 fraudes prospiciendum. Quod si vel hoc modo eos fraudu-
 lenter aliquid reticuisse appareat, vel aliàs fraus facta vecti-
 gabili v.g. prætervectione, mit Zoll verfahren/ res cadunt in
 commissum. Quod de vectigali licito & concessio intelligen-
 dum: Illicitum enim impunè non solvitur; imò si solum
 repeti potest. *vid. Dilectus Dn. Parens d. tr. c. 2. n. 237.* Priori
 tamen casu, ut & posteriori, si fortè, non animo fraudandi,
 sed quod ignoraverint, vectigal ibi institutum esse, hoc fe-
 cerint, mitius puniuntur & duplicatam saltem Gabellam sol-
 vunt. *Knichen. d. l.* Non autem absconum videtur, hæc ar-
 bitrio domini vectigalis relinquere, cum vix aliquid certi
 determinari possit. Et nihil refert an hæc à Mercatoribus
 ipsis, an verò à nautis, quos conduxerunt, fiant: Eodem
 enim modo res committuntur, & jus hoc mercibus inhæret.
 Neque id adeò iniquum & præter rationem est, ut putat *Knichen d. l.* Cum dominus mercium deinde cum tali nautâ
 agere possit, & ita iterum consequi, quod perdidit. *arg. l. 6.
 §. ult. Nauta. caup. stabul. Sigism. Buchn. thes. 164.* Si verò
 nauta non sit solvendo, tunc sibi imputet dominus, quod

D

non

non magis idoneum elegerit. Sed quaritur; an ipso jure res in commissum cadat? Quod aff. *per l. 14. de Publican.* ita nimirum, ut dominium rei commissæ ipso jure transeat in dominum vectigalis, quamvis interdum ob partis contradictionem intervenire possit sententia declaratoria, per quam possessori possessio auferatur. *Knichen. de Sax. non prov. jur. Buchn. tb. 159. Stypm. p. 5. c. 2.* Atque hinc res commissæ rei vindicatione peri possunt, tam ab ipsis principalibus, quam nomine eorum à præpositis, quæ intra quinquennium est instituenda, illo enim tempore finito perit. *l. 2. C. de vectig. v. Gotbofr. in b. l.*

Th. XXX.

Quantitas vectigalium olim fuit octava pars mercium, unde conductores vectigalium octavarii dicti *l. 7. l. 8. C. b. t.* Hodie in Imperio ubique certa quidam est, sed non eadem, & diversis locis diversa. Quæ autem semel alicubi obtinuit, servanda est, & novorum ac insuetorum vectigalium, si id Cæsar non specialiter permiserit, exactiōe abstinendum. Alioquin si id fiat, deternuntur mandata sine clausulâ & de restituendo, si quid vectigalis acceptum. Æquitati etiam consentaneum, ut quoties de novo vectigali concedendo, aut veteri augendo agitur, iudicantur, quorum interest, qui nimirum inde detrimentum aliquod vel gravamen sentire possunt. Atque olim tam odiosa fuit novorum vectigalium injunctio absque consensu Imperatoris, ut hastiludiis, sive trojaminibus autores interdicerentur. Austriæ tamen Archiduces peculiari privilegio donatos esse; ut nova vectigalia imponere possint, tradunt Dd. *Limnaus lib. 95. c. 1. Sigism. Buchn. tb. 142. Knichen. d. l.* Quamvis Imperator sine Electorum consensu nec vectigalia nova imponere nec vetera augere soleat, vigore capitulationis Caroli V. Cujus verba hæc sunt: *Wir sollen und wollen auch insonderheit / dieweil die Deutsche*

Teutsche Nation und das H. Röm. Reich zu Wasser und Lande zum höchsten vor damit beschweret / nun hinfüro keine Zoll von neuen geben noch einigen alten erhöhen ohne besondern Rath / Wissen / Willen und Zulassen der bemeldten sechs Churfürsten. Sed an hæc quantitatis vectigalium restrictio etiam ad Judæos extendenda? Sanè nec eos amplius, quàm Christianos gravari æquum est, cum alias tributum suum solvant, atque alioquin ad magis decipiendum Christianos & inhian- dum illorum bonis instigentur. Pro hoc commodo, quod Principes, aliique, quibus ipsi concesserunt, ex vectigalibus capiunt, obstringuntur, ut, si piratarum malitià mercatores vel merces persoluto vectigali damnum patiantur in territo- rio suo, illud resarciant. Quod etiam de jure Saxonico & in Gallia obtinet, & per *recessum Imperii de Anno 1559.* con- firmatur. Nisi mercator vel nauta per ambages & vias inso- litas progrediatur, tunc enim si quid acciderit mali, ipse sibi imputare debet. *Knichen. d. l.* Sed hæc usu hodiè non ser- vari, tradit *Styrmann. d. tr. p. 5. c. 1.* Deinde Salvum Con- ductum Princeps vel alius jus conducendi habens petentibus, vectigali accepto non debet denegare: Et præstatur ille, vel navibus aliis & certis custodibus, quos *Geleitsmänner* appel- lant, vel, quod plerumque fieri solet, literis, mit *Geleits- jeddeln.* His datis dominus securitatem transnavigantibus dedisse intelligitur. *vid. Sigism. Buchn. th. 237. 238. 239. 240. Styrm. p. 5. c. 1.*

Th. XXXI.

Hæc de vectigalibus: Ratione riparum præstantur Ri- patica, quæ etiam ad Regalia pertinent 2. *Feud. 56.* Et sunt provendus ac commodi, quæ tanquam vectigal quoddam occasione riparum percipiuntur, sive pro traiectione flumi- nis, sive ut liceat aliquandiu ad ripas navibus ibi alligatis quies- cere, pendantur. De cætero certum est, cum, qui natu-

rali fluminis cursu non utens per rivum forte deviat, magnam suspicionem incurrere, quod vestigalia defraudare velit. Sed anne hæc etiam in ripaticis obtinent, ita, ut ad ea evitanda devium iter quarri non possit? Quod aff. cum primò nullam videam differentię rationem: Deinde etiam ripatica vestigalibus annumerentur, imò species sint vestigalium; atq; ita eundem favorem publicum mereantur. *Dilectus Dn. Patrens tr. de Regal. c. 3. n. 62. Stypm. d. tr. p. 2. c. 5. n. 387. Diff. Sigism. Buchn. tb. 167.*

Th. XXXII.

Ulterius libertas navigationis restricta est per jus Stapulæ; quod est privilegium Civitatibus quibusdam concessum, vigore cuius præternavigantes merces suas exonerare, & ibi venum exponere coguntur. Inter has Civitates etiam referunt nonnulli Magdeburgum, quod frumentum attinet, die *Kornschiffung* / ut *Stypmann. d. tr. p. 1. c. 9. n. 34.* auctoritati Borcholti & Mindani innitens. Verùm, quam iustè hoc Magdeburgenses sibi vindicent, & prædicti Dd. ipsos defendant, disquirere paulisper operæ precium erit. Sciendum igitur est, eos, crescente, indies per fœdus Hanseaticum illorum potentiâ, regalia in Albi, quæ aliàs ad Archiepiscopum pertinebant, paulatim occupasse: Illo tempore benè observato, quo vel de Archiepiscopatu, vel de ipso Imperio lis erat. Hoc modo in turbis quietem, in damnis aliorum commoda inveniebant. Postmodum cum Burchardus ad Archi-Episcopatum pervenisset, per omnia Magdeburgenses contrarii ad varia pacta ineunda ipsum adigebant. In his etiam celebratum illud est, quo pro 600. marcis argenti Stendaliensis, quæ vix 300. thaleros efficiunt, hæc Regalia in Albi sibi concessa esse, venditant. Egregia profectò quantitas pro re tantâ: Nec verisimile est, hunc Archiepiscopum, id, quod Antecessori suo Erico Marchioni Brandenburgensi pro 9000.

9000. marcis ab Alberto II. Saxonie Electore cessum, tam exiguo precio vendidisse. Nam hoc quidem evincit pactum hoc, quod concesserit hæc Regalia, sed non, quod in perpetuum. De certo autem tempore tantum sensisse illum, exinde deduci potest, quod, cum finito illo, denuo tantundem solvere detrectarent, arces ad Albim posuerit ad inhibendum ipsis istum usum, donec iterum 600. Marcas penderent.

Th. XXXIII.

Ejusmodi illegitimis modis, (de quibus latius *vid. Dn. Benjamin Leuber tractat. quem inscribit: Disquisit. plan. stap. Sax.*) acquisitum jus stapulæ, adhuc hodiè, inanibus quibusdam & ad rem planè non facientibus privilegiis tuentur, & ad se pertinere defendunt. Verum hoc unicum ipsos satis convincere posse arbitror, quod jus Stapulæ, utpote commercii summè perniciosum, per se odiosissimum sit, nec aliter, quàm ab Imperatore, adhibito Ordinum consensu & auditis iis, quorum interest, concedi possit: Atque ad hoc demonstrandum verba expressa requiri, qualia Magdeburgenses planè deficiunt. Hæc & quæ alia huc facientia præterire cogor, quamvis pluribus persequi primùm animus erat, tamen, cum libertatem commerciorum satis *d. tr.* defendat *alleg. Dn. Benjamin Leuber* / ne præter mentem in immensum excreseat opus, ad alia propero.

Th. XXXIV.

Atque sic, in quibus jus fluminum acquisitum consistat, expositum est: Sequitur, ut postquam de ipsis fluminibus egi, etiam, quid circa accidentia eorum commoda & incommoda jura statuerint, attingam. Talia autem præcipuè quinque contingere solent: Nimirum, Vis fluminis, Inundatio, Derelictio alvei, Alluvio & Insula. Vis fluminis dicitur, quando flumen violento impetu, aliquid ablatum alteri ripæ vicino prædio adjicit. De eà in §. 21. *I. de rer. div.*

statutum invenimus, quod pars prædii alteri ademta, atque alterius prædio adjuncta prioris domini permaneat: Planè si longiore tempore fundo vicini hæerit, arboresque quas secum traxit, in eum fundum radices egerint, ex eo tempore videntur vicini fundo acquisitæ esse. *l. 7. §. 2. de A. R. D.*

Th. XXXV.

Inundatio fieri propriè dicitur, quando flumen e. g. imbribus auctum & egressum ripas, in vicinos campos se effundit, ita, ut simul alveum suum teneat. *Hinc Sen. 3. Nat. quest. 27.*

Exspatiata ruunt per apertos flumina campos,
Pressæque labant sub gurgite turres.

Ita Nilum quotannis evagantem pluviarum in illis regionibus defectum supplere constat. Ita & nostri fluvii resoluta hyeme nive, atque aquis aestate ex alto decidentibus intumescentes, sese per prata, per agros, non sine insigni accolentium damno diffundere solent. Hoc aurem factò, dominium agri ille, cujus antea fuit, non amittit, sed si recesserit aqua, ejusdem manet. Cum inundatio fundi speciem non mutet, & possessio interim animo retineri possit. *§. 24. I. de rer. div. l. 7. §. 6. de A. R. D. Stepm. d. tr. p. 2. c. 5. n. 313. Don. 5. comm. 12.* In Hollandiâ derelictus habetur ager, qui per decem annosmersus fuit, si in aliqua extent signa continuatæ possessionis. Quo in genere receptum non immeritò est, quod Romani rejiciunt *l. 23. quib. mod. ususfr. amitt.* ut si aliter nequeat, vél piscando retineri possessio censcatur. *Grot. l. 2. c. 8. de J. B. & P. Et Sigism. Buchn. d. diff. th. 58.* refert: In Rheni tracta ubivis ferè consuetudinem vigere, ut inundationis tempore etiam aliorum piscinas, si scaphâ eò venire queant, impunè episcari liceat.

Th. XXXVI.

Tertium accidens fluminum est Derelictio alvei, quæ fit, cum flumen veteri alveo relicto aliò fluere cœperit. Et ille

ille quidem (derelictus nimirum) definit esse publicus, & incipit eorum esse, qui propè ripas prædia possident; pro modo scilicet latitudinis cujusque agri, quæ propè ripam est. §. 23. de rer. div. l. 7. §. 5. de A. R. D. Contra hoc, quamvis multa dici possint & ratio ejus dubia sit; uti *Don. 4. comm. 28.* annotavit. Tamen, cum alveus à flumine occupatus, ejus naturam induerit saltem propter usum publicum, atque is exsiccatò alveo cesset, redit etiam ad pristinum statum & sit vicinorum. l. 30. §. 1. d. l. *verbis quia jam populus conon utitur. Stypmann. p. 2. c. 5. n. 297.* Accedit, quod aliàs æquum sit, quia vicini onera alvei sustinent, v. g. inundationes & agrorum convulsiones, ut tali casu eveniente per quandam compensationis rationem emolumenta habeant. *per l. 10. de R. 7.* Sed si iterum flumen ex novo illo alveo recesserit, interest, an id paulatim, & quasi per modum alluvionis, an verò subitaneo impetu, ita, ut novum illum cursum etiam non diu tenuerit, & adhuc constet, quis illius agri occupati dominus fuerit, factum sit: Priori casu iterum ad eos pertinet, qui proxima ripis prædia possident jure alluvialis accretionis. §. 23. l. d. t. l. 38. de A. R. D. Posteriori, quamvis strictà ratione obmutatum agrum in alveum, ille non veniret ad pristinum dominum, quoniam tamen hæc mutatio alvei inundationi videtur similis, ideò ea non obtinet & alveus ille denuò derelictus, ad veterem dominum redit. l. 30. §. 3. d. t. l. 7. §. 5. *cod. Ampliè. Dn. Struve prælect. ad Inst. d. t. Don. Stypmann. d. l.* Cœterum Qu. Si Baroni vel Nobili jus capiendi vectigalis concessum, an mutato fluminis cursu, adhuc vectigal debeatur? Sanè, si in alienum territorium irrumpat, res expedita est, jus vectigalis porire veteri domino: Neque tamen ob id novo domino vectigalia statim debentur, sed alià opus est concessione *Sigism. Buchn. lb. 169.* Si verò in eadem ditione maneat, videtur quidem primo intuitu idem dicendum per
l. 3.

l. 3. §. 2. de acqu. quōt. Et quod vectigal de loco in locum transferri non debeat: *Dilectus Dn. Parens d. tr. c. 2. n. 246.* Verum, cum locum non dominus vectigalis, sed natura mutet, idemque fluvius, quamvis alveo mutato, maneat, concludendum videtur, vectigalia adhuc deberi: Præsertim cum juri etiam non sit inconveniens, ut, si sine incommodo iter facientium fieri possit, transferri vectigal queat. *Stypmann. p. 2. c. 5. n. 353.*

Th. XXXVII.

Sequitur alluvio *v. lb. 34.* cujus vocabulum tripliciter in jure sumitur: (1.) Pro re, quæ accrescit: (2.) Pro ipso actu, quo alluvionem fieri dicimus. (3.) Pro effectu juris. *Stypmann. p. 2. c. 5. n. 482. Oetting. l. 2. c. 2. Hillig. 4. comm. 27. lit. b.* Describitur ea, quod sit incrementum latens, fundo nostro adjectum à publico flumine. Quæcunque igitur ita paullatim adjiciuntur, ut intelligi non possit, quantum quoque temporis momento accedit. Jure alluvionis acquisita sunt. *§. 20. l. d. t.* Contingere solet in prædiis, quæ ripis quorundam fluminum terminantur, ejusque ea natura est, ut semper incerta possessio, incertum sit ejus dominium: Nam quod hodiè possidemus, nonnunquam altero die vicini fundi domino in alteram fluminis ripam translata acquiritur. Nec tamen apud eum, cui accrescit semper remanet, sed plerumque redit ad priorem dominum cum augmento. Sæpe nec apud posteriorem manet, nec redit ad priorem, sed in arenam fluminis inundatione solvitur. *Oetting. l. 2. c. 2. ex l. fin. Cod. Justin. de Alluvion.* Est autem modus acquirendi iustissimus, cum contingat per operationem ipsius naturæ & flumina Censitorum vice fungantur. *l. 30. §. 3. d. t.* Cui accedit, quod alter, cujus agro quid detrahitur, sibi imputare debeat, quod ripas non muniverit. Et præterea, licet nulla fortè culpa imputari possit possessori, hanc naturalem vim perinde

perinde ut alium, casum fortuitum ferre debet. *Grypbiand. de Inf. c. 18.* Alluvionis incapaces sunt in genere loci, qui nullius sunt *Oetting. d. l. § Dd. ab eo alleg.* Via tamen publica, non impedit jus alluvionis, sed quod ei adjicitur proximum prædium & quod viæ contiguum est, possidenti acquiritur. Quod agro Emphyteutico alluvione adjectum, ad Emphyteutam pertinet, ita ut cætera in Emphyteusi data, cum etiam damnum, particulare scilicet, ferre teneatur. *l. 1. C. de Jure Emphyteus. junct. l. 10. de R. 7.* Fundum feudalem quod attinet, si quod ipsi augmentum alluvione accedat, quoad utile dominium Vasallo, quoad directum Domino feudi acquiritur. *1. Feud. 4. § 5. Schultz. Synops. inst. ad tit. de rer. div.* Sed an in agris limitatis locum habet? Quod neg. Si nimirum id percipimus de illis, quos captos ab hostibus populus, vel Princeps possidendos dabat; certis finibus constitutis, ut si quid accrevisset, id populi Romani esset. *l. 16. de A. R. D.* (cujus accuratorem explicationem habet *Don. 4. comm. 27. lit. c.*) Item de agris veterum Divisis, Assignatis, Quæstoriis, Centuriatis & similibus. Aff. si de hodiernis agris sermo sit: Quamvis enim hodiè agri nostri omnes limitati esse soleant, tamen id alio modo & aliis longè de causis factum. *Sigism. Buchn. res. 90. vid. latè Oetting. l. 2. c. 2.* Quod autem hic de alluvione dictum, ad alia quoque fluviatica incrementa extendere non dubito.

Th. XXXVIII.

Postremò de Insulà agendum, quæ est locus undique, aquis circumdatus. Et vel est naturalis, qualis fit: Primò, cum flumen locum alvei relinquens circumfluere cœpit. Deinde cum paulatim colluendo locum eminentem super alveum fecit. Ultimò, si alicujus agrum, qui alvei non fuit, circumfluere cœpit: Atque hoc modo, si flumen insulam fecerit, manet prioris domini §. 22. *l. d. t. l. 30. §. 2.*

de A. R. D. Vel fortuita, quæ motu violentiori & casu, sed raro fit: e.g. per terræ motum. Vel manufacta, quæ certo respectu ædificantis est. Prioribus duobus modis facta naturalis, ut & fortuita eorum fiunt, quæ propè ripas ab utraque parte prædia possident. Et si quidem in medio fluminis nata sunt, æqualiter inter ripas accolentes, pro modo latitudinis cujusque prædii dividuntur. Quod si alteri ripæ propiores sint, tunc diverso casu vel insulæ integræ, vel pars earum major, propiorem ripam possidenti acquiritur. *d. §. 22.* Verum hæc intelligenda de proprietate, quoad usum enim sunt publicæ *l. penult. §. ult. de A. R. D. Juslus Meier. in Coll. Argent. l. 41. tit. 1. n. 28. Diff. Don. 4. comm. 29. Stypman. p. 5. c. 6.* aliter hanc rem explicant. Hodie sicuti flumina publica, ita & eorum incrementa Regalibus sunt associata. Sententia verò statuentium, quod jus Civile adhuc observandum sit, eo casu æquitatem habet, quo Insula cum notabili decremento vicinorum agrorum nata, & attendenda hæc in re cujusque loci consuetudo *Ampliss. Dn. Struve Syntagm. feud. c. 6. Buchn. tb. 113. Gryph. d. fr. c. 11. n. 2.*

Th. XXXIX.

Hiscæ expositis, non incommodum fore arbitror, de remediis, quæ ratione fluminum à Prætorè dantur, necnon de delictis circa eadem, pauca subnectere. Remedia itaque illa sunt varia interdicta *vid. tit. de Flum. Ne quid in flum. pub. ripæve. Et in flum. pub. navig. sic. & de rip. muniend. ibiq. Dd.* quibus flumina ad suos usus adhibentes tuetur Prætor, contra eos, qui id quocunque modo impediunt. Atque illud quidem, quod ex *tit. 12. de flum.* datur, ad ea tantum flumina publica pertinet, quæ navigabilia sunt, ad cætera non. Quamvis rectissime Labeo & post eum Ulpianus *non esse iniquum*, scribat, *etiamsi quid fiat in eo flumine, quod navigabile non sit, ut forsitan excrescat, vel aqua cursus impediatur,*
utile

utile interdictum competere. l. 1. §. 12. 18. de Flum. iussus Meier. in Colleg. Argent. in b. 1. Interdictum ex tit. seq. 13. adversus eum competit, qui aquam fecit aliter fluere, quam prioriestate fluxit. Et idcirco ajunt, Prætorē priorem æstatem comprehendisse, quia semper certior est naturalis cursus fluminum æstate, quam hyeme. Nec ad instantem æstatem, sed ad priorem interdictum hoc refertur, quia illius æstatis fluxus indubitator est. Æstas autem ad Æquinoctium autumnale refertur, & si fortè æstate interdiceretur, proxima superior æstas erit intucunda: Si verò hyeme, tunc non proxima hyemi æstas, sed superior erit inspicienda. l. un. §. 8. Ne quid in flum. publ. Dividuntur in genere hæc interdicta, excepto ultimo, de quo inferius, in Prohibitoria & Restitutoria, ac sicut illis cavet Prætor & prospicit, ne quid fiat, ita his, ut jam facta immittave restituantur, jubet. l. 1. §. 19. & seqq. de Flum. l. un. §. 11. Ne quid in flum. publ.

Th. XL.

Interdictum de ripis muniendis eò pertinet, ne ripam munire volens impediatur, licet ejus causâ in flumine publico, si utilitas id suadeat, aliquid fiat; modò resectio illa navigationi non sit impedimento vel cum incommodo accollentium fiat. l. un. §. 6. Ne quid in flum. publ. l. un. §. 2. de ripâ mun. Hinc, cum per istas munitiones damnum inferri vicinis facile possit, tenetur is, qui ripam vult munire, vicinis & his, qui trans flumen prædia possident, in annos decem boni viri arbitrato cavere, vel satisfacere secundum qualitatem personæ d. l. un. §. 3. 4. de ripâ mun. Post opus factum, si antea non cautum fuerit, L. Aquil. si quid damni datum, vindicari debet d. l. un. §. 5. Est autem ripas munire, aggeribus factis aquam fluviatilem coercere, ne excresecens flumen agrum occupando damnum inferat. Idcirco non eas ripas muniri necessum est, quæ à plano versus aquam dependen-

dent & publicæ sunt; nullum enim facile damnum metuen-
dum à flumine, quousque naturaliter fluit. Sed eas, quæ in
plano sunt, & quarum proprietas ad privatos pertinet. In-
deque eas non à populo, sed iis, quorum sunt, muniendas
esse duco. Atque hoc indicant verba edicti Prætoris *l. un.
pr. de rip. mun.* Quo minus illi in flumine publico ripam ejus
opus facere, ripe agride, qui circa ripam est, tuendi causâ
liceat. &c. Ex quibus cum pateat, eum qui ripam munit,
non id ripæ tantum, sed & agri, qui circa eam est, tuendi
gratiâ facere, simul intelligitur, ripam munientem agri ad-
jacentis dominium esse: Quem enim alium utilitas illius tan-
gere potest? Accedit, quod omne commodum possidens
ripam ex eâ capiat, & quilibet rei suæ curam agere teneatur.
Quamvis autem proprium emolumentum quem non moveat,
ut muniat ripas, ad id tamen ab Imperatore invitus compelli
potest, cum hoc publicæ utilitati debeatur. *Dilectus Dn. Pa-
rens d. tract. c. 3. n. 62.*

Th. XLI.

Cæterum inter varios modos, quibus aliquid fieri pos-
est, vel immitti, quo usus fluminum deterioretur, recen-
sentur præcipuè Aquæductus & Molendina. Est verò aquæ-
ductus jus-aquam ducendi è flumine per alienum prædium ad
suam utilitatem. Et quidem in privato flumine hoc jus iis-
dem modis acquiritur, quibus alia ejusmodi jura: In pu-
blico, concessione Principis, *l. 2. de flum.* aut præscriptione,
cujus non extat memoria, in contrarium. Hæc immemo-
rialis præscriptio solet probari per testes, si accollæ deponant,
se à majoribus semper audivisse, aquam hoc modo è flumi-
ne ductam. Necessè autem est, fiat aquæductus sine fundi
servientis detrimento, & modus ducendi primævus omnino
teneatur. *Sigism. Buchn. tb. 68. 70.* Varias de aquæductibus
quæstiones *vid. apud Noë Meurer. p. 57.*

Th. XLII.

Molarum de cætero singularem gerere curam, ad Reipub. salutem videtur pertinere; Indeque eorum despoliatio, contractio, destructio tempore belli sub poenâ capitis est prohibita. *Sigism. Buchn. lb. 118.* Exstruuntur molendina vel in flumine privato; vel in publico. In illo quidem liberè & sine ullâ autoritate Principis ædificare licet; modò tamen primò merè facultatis ea res fuerit: Puta nisi post interpositam prohibitionem, præscriptio vel alterius privilegium ut solus molat, obstat, vel aliàs certus in illis locis & definitus sit molarum numerus. *Petr. Frid. Mind. de Mand. l. 2. c. 38. n. 3.* Deinde, si saltem id faciat boni publici ergò, non ex nudâ æmulatione, non nocendi animo: Colligitur ille, si impensæ in molendinum factæ excessuræ sint commodum, quod inde percipi posset. Atque tunc paratum est remedium novi operis nunciationis. In hoc (*publico videlicet flumine*) molendinum absque permisso Principis exstruere non licet per textûs, ubi dicitur: *In flumine publico nihil à quoquam fieri posse, quo vel navigatio, vel statio; vel cursus fluminis aut difficilior fiat, aut usus fluminis corrumpatur, vel minor ac rarior efficiatur.* *Ampliss. Dñ. Struve Syntagm. Feud. c. 6. Petr. Mind. de interdict. tit. 6. Stypmann. d. tract. p. 2. c. 5. n. 126. vid. latè hanc quæstionem tractans Hering. de Molend. c. 15. num. 23. &c.* Neque admitto hic distinctionem inter flumina navigabilia & non navigabilia; quod scilicet, si in illis velit molam ædificare, necesse habeat Principis adhibere consensum, in his non: Cum eadem utrorumque quod hoc attinet, sit ratio per *l. 1. §. 12. versic. sed Labco de flum. l. un. §. 2. Ne quid in flum. pub.* Sed si quis jam molam ex Principis concessione habeat, anne alius potest impetrare, ut sibi etiam ædificare liceat, ita, ut alteri inde damnum oboritur? Quod neg. Cum Princeps, quod semel concessit, non ita absque

causâ iterum auferre, aut aliquid, quod alteri nocet, concedere soleat. *l. 2. §. 10. Ne quid in loco püb.* Si etiam contra factum fuerit, obreptionis beneficium opponi potest, & secunda ejus jussio expectanda est: *Scyppmann. d. tr. p. 2. c. 5. n. 157. & Dd. ab eo allegat. Besold. Dissert. de rer. div. c. 2. n. 2. addens: Licet ob constructionem molendini novi alteri vetustiori præjudicium afferatur, daß es ihme an den Kunden Schaden bringt / id non esse justam causam impediendi eam.* Quod probo, si levius saltem hoc damnum sit: Cæterum si tale sit, ut vix impensas ex redditu recipiat, contrarium statuo. Succedit alia quæstio: An nimirum dominus molendini superioris, tempore siccitatis, vel aquarum penuriaz aquam colligere possit invito damino molendini inferioris? Et salvo pacto sive consuetudine, quæ adest, distinguo. Aut inferioris conditio sit deterior aut etiam si aquæ recollecta (ut loquuntur) non fieret, molere tamen non posset: Priori casu potest, posteriori non potest recolligentem aquas impedire.

Th. XLIII.

Postremò de delictis quædam adjungenda veniunt: *vid. lb. 39.* quorum coërcitio ad Jurisdictionem & merum Imperium habentem pertinet. Hinc est, quod si quis in flumine suffocatus reperiatur, nonnisi ab eo, qui Jurisdictioni ibidem loci præest, tolli possit, quod vocant: *Gerichtlich oder mit dem Gericht auffheben.* Ratio ejus est, ut cognoscere possint judices, an fortuito, an vero deliberato consilio flumini sit immerfus: Item, an non fortè alibi occisus in illud deinde dejectus sit: Atque causâ cognitâ, quid de cadavere fieri velint, disponere. Quod si ab alio potestatem tollendi non habente extractum cadaver, vel aliò portatum fuerit, necesse est, ut ab illo iterum ad locum devehatur: Imò è terrâ sepultum eruitur, junctâ gravi temerata Jurisdictionis pœnâ additâque protestatione, ne hoc actû deinceps

ceps quaesito juri præjudicetur. *Stypmann. p. 5. c. 1. n. 19.* Quod in præcedentibus dictum, ad alia mortis violentæ genera notoriè extenditur: Nequaquam enim ejusmodi cadaver, ab alio; quam cui in eo loco Jurisdictio competit, tolli potest.

Th. XLIV.

Delicta, quæ in fluminibus potissimum patrantur, sunt:
 (1.) Piscatio in alieno. Hoc, qui committunt, æquiparantur furibus, & pœna furti etiam in eos statuta est in *S. R. Imp. Const. pœn. const. 169. Oetting. de jure & contrav. lim. l. 1. c. 12. lit. u.* (2.) Illud, quod Piratæ committunt, auferendo bona navigantibus, & intuta reddendo itinera. Horum persecutio his incumbit, quibus penduntur vectigalia: Capti verò eadem, quæ prædones, pœnâ plectuntur. *Mindanus de interdict. sit. 6. n. 39. Matthæus de crimin. tit. 2. c. 2.* (3.) Ruptio aggerum: Et Princeps quidem vel alii superiores, summâ necessitate & utilitate publicâ id exigente, fortè ut hostes eò melius arceri queant, jubere possunt, ut aggeres perfodiantur, daß die Thämme durchstoßen und das Land unter Was-
 ser gesetzt werde: Idem verò à privato fieri sub gravi pœnâ vetitum est. Nam in *l. penult. de Extraord. crim.* pœna extra ordinem statuta est; Nimirum pro conditione personarum & admisi qualitate, damnatio, vel ad metallum, vel ad aliud opus publicum. Sed hæc deinde ab Imperatoribus Honorio & Theodosio exasperata est, dum in *l. un. C. de Nis. agg. non rump.* rumpentem aggeres flammis comburi jubent, eo loco, quo vetustatis reverentiam & propemodum ipsius Imperii appetierit securitatem. Neque hæc pœna ad eò atrox est: Si enim incendiariis, non solum quando homines flammis ab ipsis suscitatis perire, sed & ob præsens periculum mortis & bonâ miserorum incendio consumpta hoc modo plectuntur: Cur non & aggerum perfossores, cum vis fluminis in agros immisi homines, pecudesque ac villas
 per-

perdere soleat? Cœterum hæc omnia, quamvis saltem de Nili aggeribus ruptis statuta sint, Dd. nihilominus etiam ad nostra flumina extendunt: Poena autem pro regionum varietate & damni perfodiendo dati qualitate variat. *Matthæus de crim. tit. 5. c. 3.*

Atque hoc modo materiam de FLUMINIBUS aliquo qualiter pro modo instituti delineasse sufficiat. Cœtera, quæ hic tantum non intacta, aut prætermissa penitus videbuntur, non angusti Disputationis, sed extensi magis Tractatus limites capiunt. In materias enim me incidisse fateor, quæ singulæ peculiari scripto materiam suppeditarent. Tu, operam nostram, benevole Lector, boni consule, ac non tam eventum respice, quam conatum.

ÆMula Permagni generosa propago Parentis,
Virtutes artemque colis bene juris & æqui.
Sic porro Patris vestigia clara sequaris:
Ejus Te laudes & gloria summa sequetur.

*Hoc autofchediasmate faventem & gratantem
animum exhibere voluit genere, virtute
ac eruditione Nobilissimo Dn. Respondenti,
amico suo suavissimo*

Georgius Adam Struve / D.

F I N I S

